

une pinace nommée la Magdelaine pour Tadouffac ,  
mais le vent & la marée nous furent tellement con-  
traires, que nous fufmes trois iours à pouuoir doubler  
le Cap, & puis le temps se remit au beau, nous donna  
moyen de ranger toufiours la cofte à main gauche, &  
en fuitte les monts noftre Dame, qui contiennent en-  
viron vingt cinq lieuës de longueur, pour lors encore  
en partie couuerts de neige, bien qu'il n'y en eut  
148 || plus par tout ailleurs.

Or les Mattelots qui ne demandent ordinaire-  
ment qu'à rire & se recreer, pour adoucir & charmer  
aucunement les trauaux qu'ils fouffrent en voyageant,  
font icy des ceremonies dignes de leur esprit à l'en-  
droit des nouveaux venus, & lesquelles les Religieux  
n'ont encore pû abolir. Un d'entr'eux contrefaiët le  
Prestre, qui feint de les confesser en marmotans quel-  
que \* mots entre ses dents, puis les baptize à fa mode  
en leur versant fur la teste une grande platée d'eau  
fresche, les presche, les exhorte & leur faiët tant de  
mal que pour en estre bien tost quitte, ils sont con-  
trainçts de se rachepter de quelque bouteille de vin,  
ou d'eau de vie, à discretion. Que si on pense faire le  
retif on empire d'autant son marché, car cinq ou six  
Mattelots empoignent le galant, & le plongent la  
teste la premiere dans un grand bacquet plein d'eau,  
comme ie vis faire à un grand garçon, qui ne vouloit  
obeïr à la loy, laquelle porte, que comme le tout se  
faiët selon leur coustume ancienne & par recreation,  
ils ne veulent pas qu'aucun se desdaigne de passer par  
icelle, ains gayement & de bonne volonté s'y souf-  
mettre, i'entends les personnes seculiers & de medio-